

# Galesia

## *Bolou Galesiabiaho hisaliale*

<sup>1</sup> Dau di ivilike Bolo. Ataeau di ebagevai di hanavoge di abostolo lovi ko vaholima. Isito nahie Mama Dilavau hatihatimo Iesu Keliso etuvale keike di ebagemage di abostolo lovi ko vama.

<sup>2</sup> Di levaleva ko hisaliai Galesia dubu bahata laheho hanavonu. Ige kove evievi ataeau daluvuta uale keau abu vahaeho hoto loui laheho hanavolu.

<sup>3</sup> Di isivialeike nahie Mama Dilava isi nahie Kossive Iesu Keliso keau la huhuevei la hoesegevege lana ue dua vave.

<sup>4</sup> Iesu Keliso keu au isivi vaholisito Dilava isivi vai nahie toelaho hatinu. Keu hatai isivialeike Dilava nahi malevege nahi aike vatae vaveve toela va halevai.

<sup>5</sup> Katealemo nahi vani bahata Dilava ivi ebagevai hoeshavoale keu duave.

## *Iesu hoto igaeike hotoe dua*

<sup>6</sup> Di la vaveve ke evisi vikoanu. Kosealemo Dilava la hohavege la hotove evige Iesu Kelisou laheho uvuai la tedaevenu. Isito solekavesite la ke halevai ata degomolebia hoto evisi ehovei loui kosea, “Keu mesoho hotoe dua.”

<sup>7</sup> La katelahaito hoto mole duaau uoholinu. Iesu Keliso ke hoto igaeike hotoe dua. Di hilokage ata degomoleau lae lohoale la uvu isi isiviale Iesu hoto ke aiohavoi hoto nimole loui. Kemoike la dolodololahalu.

<sup>8</sup> No subuta lae lohoale hoto seleve loui la haivelu. Isito mesoho no moleu hoto seleve ke

halei hoto ni molete loui la haivege lainaho ke evilive. Isi mesoho anelu moleu lae lohoi hoto nimolete louge lainaho keta evisi malive. Ata oleu hoto seleve ke halei hoto ni molete loui la haiveale ke di isivialeike keu tai venemo lahai vatehani malei.

<sup>9</sup> No subuta tiale laheho louale hoto ke di isivialeike tota laheho lou moleai. Ata oleu lae lohoi no subuta laheho louale hoto kateale louoholisito hoto nimolete louge hoto keu hoto seleve holioholinu. Di isivialeike ata katealeu tai venemo lahai vatehani malei.

<sup>10</sup> Di hoto kateale louge la huhuige ataeabuna ke evisi di ivi ebagevai. Ba, abu katelahalivebene. Di katealeho isiviholinu. Isito di isivialeike Dilava ivi ebagemai. Dana atae isivi vai kemo hoto louniege di bae Keliso esemu seleve holilivebene.

### *Bolou abostolo holiale deiada*

<sup>11</sup> Di haokuvuia, di la namigevege evive. Di hotoe dua loui la haiveale keu atae hoto holioholinu.

<sup>12</sup> Atabeu hoto ke loui di haivuholinu. Di atae hoto ke evioholinu. Isito Iesu Keliso keike hoto ke daho loui di haivunu.

<sup>13-14</sup> La hilokage dau Diue ata. Di subuta Diue vaveve kemo luleleai di simini kebia evigevenu. Isi di vavivuie vaveve ketamo negoinata ke manu. Di kateinata ekalesiaho uvuholisi vatehani ovei isivialeike kebia bahata havehatui.

<sup>15</sup> Isito di uoholisege Dilavau di huhuai daho uvuai di ebagemanu. Iniale di uge vani mole au di hohavoi isivialeike di lovive vai.

<sup>16</sup> Vani mole Dilavau au moe vaveve daho loui isivialeike di hotove dua loui Diue ata holioholiale kebia haivei. Dilavau daho hoto ke louge di ke ihu kaovaliho atabe namihaholinu.

<sup>17</sup> Dilavau di ebagemage di abostolo ata holinu. Isege abostolo degomole keau Dielusalemae ua. Iale di kebiamo hoto ke ihu kaovaliho tioholinu. Di kebiae tioholisito solekai halei Alebia vatae tinu. Di keve uniale halei tota hoilahai Damasikasie tinu.

<sup>18</sup> Iniale vagana abuita igaetaeau uoholisege di bae Dielusalemae deiai tinu. Di keve velemai bula abuita uvumo abostolo mole Bitati ua.

<sup>19</sup> Di keve ui abostolobe moaga elegeveholinu. Isito Bitata nahie Kosive ke hoho Diemisita di elegevenu.

<sup>20</sup> Di hoto ko louale kou seleve. Dilavau hilokage di la lobogeveholinu.

<sup>21</sup> Di Dielusalamae uniale halei Silia vata isi Silisia vata kebiae tinu.

<sup>22</sup> Vani kemo Diudia ekalesia keau di Dielusalemae uale ke hilokaholisi elehaholilu.

<sup>23</sup> Isito ata degomoleau di deiada louale ke unaha abu evilu. Ata keau loui avoe, “Nahi aiogevei nahi havemale ata keu aike Dilava ehomai hotoe dua loui ata haivema. Keu subuta evievi ata havei isivialeike kebia bahata havehatui. Isito keu aike ke halei hotoe dua loui ata haivema.”

<sup>24</sup> Iale evievi ata keau di deiada evisi Dilava hoesehavolu.

## 2

### *Bolou Dielusalema ekalesiah i hotohotoale*

<sup>1</sup> Di Dielusalema halei tiale vagana votiniu (14) uoholige no Banabasiti Taitasi melavei avuluvuta Dielusalemae tota hoidevei tilu.

<sup>2</sup> Dilavau di namihage di keve tiale Diue ata holioholiale kebiaho di loumale ke loui Dielusalema dubue kosive haivenu. Di ekalesia bahata haiveholisito kosive kebia unaha haivei isivialeike

keau di vaveve ke evisi hilokage di lovi di subuta vamale isi nova vamale keau seleve holilu.

<sup>3</sup> Di kebia haivege keau di hoto evisi malu. Di keve uge di haoka Taitasi keta ua. Keu Diue ata holioholinu. Isito keu Giliki ata. Iale keau di hoto evisi male kemo isiviholialeike Taitasi hanavoge au Diue vaveve vai au vudie vate etuleliho.

<sup>4</sup> Isito loboe evievi ata keau lohoale evievi atae vaveve nahate vai hovedevey Taitasi namihai loui avoe, “A vudie vate etulenela.” Ata keau abu vaveve mahogovai tobekai lohoaleau isivialeike Iesu Kelisou no malevege no Diue menaka ehovaholiale ke abu kaovai elehaito no malevege no isiviabe ke unaha vai Diue menaka ehovagei.

<sup>5</sup> Keau katelahage no kebia hoto evisi isiviabehame vaholilu. Isito no hotoeabe hamai isivialeike loboe hoto ke bamui. Ige elike kemo lana hoto seleve ke mai hilokage Dilavana la evievimo la malevei.

<sup>6</sup> Isito Dielusalema keve dubue Kosive nehe degomole keau uito di kebia huhueveholinu. Kosealemo Dilavau bae atae vavae vaveve ke huhuai kaovalivebene. Isito auna atae uvu unaha kaovai ke unaha huhuigei. Iale di kosive kebiaho di deiada louge keau Diue vaveve kemo hotobe loui di namiyaholilu.

<sup>7</sup> Keau di hoto ke evisi hilokage Dilavau lovi ke mai daonu. Ilike vase di tiale hotoe dua loui Diue ata holioholiale kebia haivenu. Keau hilokage Dilavau subuta Bita ebagemage Bitau hotoe dua loui Diue ata kebia haiveale ke nahate Dilavau data ebagemanu.

<sup>8</sup> Dilavau vuvune mai daoge di abostoloe lovi vai Diue ata holioholiale kebia haivema. Dilavau subuta kateai vuvune mai Bita omige Bitau

abostolo lovi vai Diue ata haivema.

<sup>9</sup> Bita igaeu lovi ke vaholinu. Isito Diemisi, Bita isi Dioni keau lovi ke kosivea. Iale keau hilokage Dilavaike daho lovi ke ebagemanu. Ige kosive keau data Banabasita no ada hatuevei noheho loui avoe, “Laeau talive tota Diue ata holioholiale kebia haiveve. Isege noeau Diue ata kobia haivei.”

<sup>10</sup> Keau katelahai noheho louito hoto ko igae noheho loulu. Avoe, “No isivialeike laeau kunaiholimale kebia tedaevei hoesegeveve.” Abu katelahai louge di data lovi katealeho isivianu.

### *Bolou atae nimo Bitaho lounu.*

<sup>11</sup> Iniale vani mole di Antiokae usege Bitau lohoale vaveve mole toela vage di ke elehai atae nimo avuho hoto mole lounu. Vaveve kosealemoike di avuho lounu.

<sup>12</sup> Bitau Diue ata holioholiale kebiahi igae-toai ugulamoi abuhi lovi ima. Isege Diemisiu Dielusalemae evievi ata degomolebia hanavege abu Antiokae loholu. Ige Bitau kebia elegevei au abuhi lovi imale kebia halevenu. Keu kebia halevei tota abuhi lovi ioholinu. Kosealemo Dielusalema ata keau negolahai isivialeike Diue ata holioholiale keau vaveveabe nahate vai abu vudie vate bohisi. Kemoike Bitau kebia elegevei vabuai Diue ata holioholiale kebiahi tota lovi ioholinu.

<sup>13</sup> Bitau kateige Antioka Diue ata degomoleau Bitaluvuta igaetolahai lovi imale keau Bita vaveve elehai abuta Diue ata holioholiale kebiahi lovi ioholilu. Keau katelahai loboe vaveve vage Banabasita kebia elegevei ehovenu.

<sup>14</sup> Ige di vaveveabe ke elehage vaveveabe keu hoto seleve ke ehomaholinu. Hoto seleve keu loui avoe, “Diue ata isi Diue ata holioholiale keau mole nahate.” Ilike vage di atae nimo hovelahai Bitaho loui kosea, “Au Diue ata. Isito a kove lohoale Diue vaveve vaholisito Diue ata holioholiale kebiahi igaetoui abuhi lovi ima. Di ke elehage a vaveve keu duave. Isito Diue ataeau Dielusalema halevai lohogē a Diue ata holioholiale kebia halevei tota a subuta vamale Diue vaveve ke vanu. A kateai isivialeike Diue ata holioholiale keau ke elehai Diue vaveve ke nahate vai.” Di hoto kateale Bitaho lounu.

*Evievi unahamo ataeabuna Dilava nimo inutolotoloai.*

<sup>15</sup> Isito di laheho louge evive. Bita isi da noeau Diue ataea. No neinuvuiau no houevege no Diue ata holioholiale ata kebia toela nahate vaholisito Diue menaka eholovalu.

<sup>16</sup> No hilokage no Diue menaka eholovamale kemo Dilavau bae noheho hoto koseale loulivebene. “Laeau inutolotolote ataea.” Noeabuna Diue menaka ke eholovaholisito no uvu mai Iesu Kelisomo mavoliege Dilavana noheho loui kosea, “Laeau inutolotolote ataea.” Di louale keu koseanu. Ata oleu Diue menaka ehomamale keho Dilavau bae inutolotolote hoto ke loulivebene.

<sup>17</sup> Isito noeabuna Iesu Keliso eholvai isiviale no vaveve keu Dilava nimo inutolotoloige no tota hoidevei Diue menaka vage la huhuige Iesue-monike vaveve toela keu lohonu. Ba, keu kateholinu.

<sup>18</sup> Di hilokage di subuta Diue menaka onole haleale ke dana tota hoilahai va moleaniege dau vaveve toela vamale ata da.

**19** Di subuta Diue menaka ehomanu. Isito di aike ke halenu. Ata oleu hatiale keu bae atae hoto evilivebene. Ke nahate di vai menaka ke ehomaholima. Di kateale vai isivialeike Dilavaau vamale ke nahate di vasei.

**20** Iesu Kelisou idie domo hatiale ke nahate data vanu. Di aike uale keu di uveve holioholinu. Isito Iesu keike uveve doga daoge di kemo uma. Di hilokage keu Dilava mo. Keu daho isivi balugaike vaime di toelaho hatinu. Keu daiti uale kemo dana vani bahata di uvu mai avuemo mamoniege ui tigei.

**21** Iale di bae Dilavaau daho uvuai au mo hanavoale ke kabebihavolivebene. Ataaeu Diue menakamo Dilava nimo inutolotolovatebe Iesu Keliso keu hatioholinu.

### 3

#### *Diue menaka emena Dilava hoto*

**1** Galesia ataea, lana tilogolahalu. Oleike la uvu inu. Di subuta lae lohoale Iesu Kelisou idie domo hatiale hotove ke loui neniai la haivege la ke evisi lulelelahalu. Isito oleike aike lohoale la uvu ige la hoto ke halevalu.

**2** Di hoto mole igae loui la namigevege evive. La oleve kateike vaime Dilava Munanae Tumu malelu. Lana Diue menaka ehovaike vaime ke malelu.

**3** Iale osialemoike la tilogoe vaveve ke nahate vama. La subuta Dilava hoto evige Munanae Tumu la malevei la negotievenu. Isito ose la isivialeike ke halevai la vuvune unahamo negolahai.

**4** La Iesu ehovaike vatetumu maleale keu oleve kateanu. Lainaho ke huhulahai Iesu halevalive.

<sup>5</sup> Osialemoike Dilavau Munanae Tumu laovei la vigomo vikoe vaveve vaevenu. La huhuige la Diue menaka ehovamale kemonike au au Munanae Tumu laovenu. Ba, la hilokage la hotove evisi maike vase au au Munanae Tumu laovenu.

<sup>6</sup> Ebalahamu vaveveu ke nahate. Bukae Hotou loui avoe, “Ebalahamu Dilava hoto evisi au uvu mai avuemo mamonu. Kemoike Dilavau vaveveve elehai avoe, ‘Keu di nimo inutolotolote ataike.’ ”

<sup>7</sup> Iale di laheho louge evive. Ata oleuoleu abu uvu mai Dilavamo mavoale keau Ebalahamu valada selevea.

<sup>8</sup> Subuta mole Bukae Hotomo Dilavau gabie vaveve elehai loui avoe, “Diue ata holioholiale keabuna bae abu uvu mai daemo mavoge dana abuho loui kosea, ‘Laeau inutolotolote ataea.’ ” Iale hoto kemo Dilavau Ebalahamuho loui avoe, “A a uvu mai daoale kemo dana vatae ata bahata hoesegevei.”

<sup>9</sup> Ebalahamu au uvu mai Dilavamo mamoge Dilavau hoesehayonu. Iale olena Ebalahamu vale ke nahate vai abu uvu mai Dilavamo mavoge Dilavana kebiata hoesegevei.

<sup>10</sup> Isito ata oleuoleu Diue menaka unaha ke huhulahai negolahamale ata kebia nohovu. Kosealemo Bukae Hotou loui avoe, “Ata oleuoleu menaka bahata ehovaito menaka igae hosidiale kebia Dilavana aiogevei.”

<sup>11</sup> Nahi hilokage ata oleu Diue menaka ehomamale ke vaveveu bae Dilava nimo inutolotoloalivebene. Kosealemo Bukae Hotou loui avoe, “Olemeau abu uvu mai Dilava omisime nivemo inutolotoloale keabuna abu evievimo ui tigei.”

<sup>12</sup> Isito ata oleuoleu menaka unaha ehovamale keau abu uvu mai Dilavamo mavoholilu. Bukae Hotou loui avoe, “Ata oleuoleu abu uvu mai menakamo mavoi ke bahata vamale keabuna menaka ke unahamo ugei.”

<sup>13</sup> Isito Iesu Keliso nahie toelae ibinaho hatinu. Bukae Hotou loui avoe, “Ataeau ata mole mai idimo umuvai hamage keu keve uale ata keho Dilavana itumuai aiohavoi.” Iale Iesuu idie domo hatai nahie toelae ibina vage Dilavau nahi aiogeveholinu.

<sup>14</sup> Iesu Kelisou hatiale kemo Dilavau isivialeike Diue ata hoesegevei Diue ata holioholiale kebiata hoesegevei. Dilavau subuta Ebalahamu namihai avoe, “A vavevemo dana vatae ata bahata hoesegevei.” Iale Iesu hatiale kemo Dilavau loui avoe, “Dana di Munanae Tumu laovei.” Ige nahabuna nahie uvu mai Dilava omiliege Munanave Tumu ke malei.

<sup>15</sup> Di haokuvvia, nahi vani bahata vamale nahie vaveve kemo dana hoto mole loui la haivege kemo lulelelahave. Mesoho atabe abuiau ono mole loui ke mai selevetisi bebamo hisaliasege ke iae ata moleu bae lohoi hotoeabe ke egumalivebene.

<sup>16</sup> Subuta Dilavau Ebalahamuho hoto loui mamoi namihai avoe, “Dana ata a valada keta hoesehavoi.” Bukae Hoto kemo Dilavau hoto koseale louholinu. “Dana a valada kebiata hoesegevei.” Isito keu loui avoe, “Dana a valada keta hoesehavoi.” Au valada ke louale keu Iesu Keliso.

<sup>17</sup> Di hoto louale ke ihuike ko. Dilavau au ono vade vaveve ke hoto Ebalahamuho lounu. Au avuho loui avoe, “Di bae di hoto aho louale ke halelivebene.” Iniale vagana voa handele tetiu (430) uoholige Dilavau menaka mai Mosese

ominu. Ige menaka keu subuta Dilavau Ebalahamuho louale hoto ke bamuoholinu. Isito hoto keu ui egeanu.

**18** Dilavau Ebalahamuho hoto ke loui mamoru. Iale nahi bae Mosese menakamo Dilava onobenobe ke malelivebene. Isito Dilavau Ebalahamuho louale hoto kemo nahiabuna Dilava onobenobe ke malei.

**19-20** Iale osialemoike Dilavau menaka mai Mosese ominu. Dilavau menaka ke mai Mosese omisi isivialeike menaka kemo ataaeau abu vaveve toela vamale ke hilokai. Isi isivialeike menaka keu ulage Ebalahamu valada keu lohogeto menaka keu bae gabiai uoholisi. Subuta Dilavau Ebalahamuho louale valada keike di louma. Isito Dilavau menaka ke mai anelu ovege aneluiau mai Mosese omilu. Ige Moseseu ke mai ata ovenu. Mosese keu Dilavata atata vigomo laminu. Isito Dilavau Ebalahamuho louale ke vigomo atabeu lamioholinu. Isito Dilava igaeu inuta Ebalahamu namihanu.

**21** Iale la huhuige Dilavau menaka mai Mosese omiale kena subuta Dilavau Ebalahamuho louale ke bamunu. Ba, keu kateholinu. Keu katevatege ataaeau menaka kemo ukolikoli malelu. Isito menaka kemo atae vaveveu Dilava nimo inutolotoloholinu.

**22** Kemoike Bukae Hotou louale vaveve toelau vatae ata bahata bamuevei gabianu. Isito oleuoleu abu uvu mai Iesu Kelisomo mavoale keabuna Dilavau louale ukolikoli ke malei.

**23** Isito evievie vaveve keu lohoholisege menaka keu nahie malevenu. Keu nahi umudievei malevei dibulae otoveale ke nahate vanu.

<sup>24</sup> Evievi vani keu lohoholisege nahiau menaka valamo ua. Ige Iesu Kelisou lohoge nahi nahie uvu mai avuemo mavoge. Dilavau nahie hoe-segevei isiviale nahie vaveveu nivemo inutolotoloai.

<sup>25</sup> Katealemo menaka keu aike nahi nalieveholima. Isito nahi nahie uvu mai Iesuemo mavoge keu aike nahi nalievema.

### *La Dilava ese holilu.*

<sup>26</sup> La la uvu mai Iesu Kelisomo mavoale kemoike la bahata Dilava ese holilu.

<sup>27</sup> La bahata babatisoale kemo Iesuluvuta igae-tolahai avu nahate vaime vaveve dua ke vama.

<sup>28</sup> Katealemo Diue ata isi Diue ata holioholiale keau nimole holioholilu. Isito keau mole nahate. Ige heiata lovilahamale isi eve abu isivi vamale keau mole nahate. Ige malahaean keatehi mole nahate. La bahata Iesu Kelisoluvuta igae-tolahai atave holilu.

<sup>29</sup> Lana Iesu Keliso ata holiliege kemo lana Ebalahamu valada holive. Isi Dilavau subuta Ebalahamuho onole louale ke lana maleve.

## 4

<sup>1</sup> Isito di tota hoto mole louge evive. Ese molena au ebia holisito au mamae kunai ke bahata malei. Isito keu esebuluta uale kemo au bae au mamae kunai ke malelivebene. Keu au mamae esemu kebia nahate.

<sup>2</sup> Ese keu esebuluta usege ata degomole abuna ke nalisi kunaive keta nalisi. Iniege mamaveu vani ebagemale kena lohoge abuna bae kunaive ke malei omisi.

<sup>3</sup> Nahie humahau ke nahate. Subuta Iesu lohoholisege nahiau esebulu ke nahate. Vatae

vaveveu nahi malevege nahi atae menaka unaha vama.

<sup>4</sup> Ilage Dilavau vani ebagemale ke vaniu lohogē Dilavau au mo hanavoge keu Diue vatae keate mole ese holinu. Isime Diue menaka ke ehomanu.

<sup>5</sup> Menaka ke ehomai isiviale Diue ataaeu menakae valamo uale kebia ibina vai malevege abu Dilava ese holisi.

<sup>6</sup> Nahi Dilava ese holilike vase au au moe Munnanae Tumu hanavoge au nahie uvumo lohoale nahie tedaevege nahi Dilavaho loui kosea, “No Mama.”

<sup>7</sup> Katealemo nahi bae tota vatae esemu holilivebene. Nahiau Dilava ese. Nahi Dilava ese holiale kemo Dilavau louge nahiabuna onobenobeve ke malei.

### *Bolou Galesiabiaho huhuanu.*

<sup>8</sup> La subuta Dilava seleve hilokaholilu. Kemo la onobenobe adata vale kebia hoesegevei kebiaho loui kosea, “No dilavaea.” La katelahaito keau Dilava seleve holioholilu.

<sup>9</sup> Isito novae vani komo la Dilava seleve hilokalu. O dana loui kosea, “Dilavau la kebia hilokagevenu.” Kateaito vadealemoike la isiviae hoidevei la subuta vamale ke nahate tota vai. Mesoho la isivialeike vatae vaveveu tota la malevege la isivive unaha vasei.

<sup>10</sup> La vani mole mesoho bata mole mesoho vagana mole ebagevai ke mai tumutisi ke hoesehavoi huhuige Dilavana kemo no malevei.

<sup>11</sup> La katelahage di ke elehai la vabugevenu. Mesoho di la haivege la luleleholialemoike di lovi keu ihuoholinu.

<sup>12</sup> Di haokuvuia, di isivialeike la di vale ke nahate vase duave. Di subuta la kebia nahate

vama. Isito di aike kateale vaholima. La vaveve toela vamale keu di aiohavoholinu.

<sup>13</sup> Di dogata lae lohoniale vavahanita hotoe dua loui la haiveale ke lana huhulahalu.

<sup>14</sup> Di vavau kateai toelage keu laemo isuige la di kabebihavoi di iovaholilu. Isito Dilavaau anelu hanavoge la ke hoesehavoveve ke nahate la di hoesehavolu. Isi Iesu lae lohogē la hoesehavoveve ke nahate la di hoesehavolu.

<sup>15</sup> Vani kemo la di vahaeho vai di tedaholu. Nie bai iavoveve keu tololaholivatege la la nie bai iavoi mai daoge di mai di nimo mamoge di niu duave holinu. La subuta katelahai di vahaeho valu. Isito la aike osiolu.

<sup>16</sup> Di subuta hoto seleve loui la haivenu. Iale kemo lana aike di kabebihavoi daho itumulahama.

<sup>17</sup> Di la haiveito lohosege ke iae ata degomoleau lae lohoale la haivei la hoesegelovelu. Isito uvuiabe keu toelanu. Keau isiviai daemo la malevelive elike la di hoesehavomale ke nahate kebia hoesegelovei.

<sup>18</sup> Ata keau vani bahata uvue duamo la hoesegelovege keu duave. Isito keau kateholilu. Di lahehi usege keau vaveve mole valu. Iliale di la halevesege keau tota vaveve nimolete valu.

<sup>19</sup> Evive. Laeau di ese nahate. Keate mole ese uho vage tumuu hamale ke nahate di tota la vaveve ke huhuai laheho uvuanu. Dana vani bahata uvualage la Iesu Keliso vale ke nahate vage dana bae uvuale ke halei. Isito la aike kateholige di ke huhuai laheho uvuanu.

<sup>20</sup> Di isivi balugaleike di lahehi ui. Ilive elike la vaveve elehai laheho uvuai la hoesegelovei. Kosealemo di la huhueve baluganu.

*Heigata Selata vaveve*

**21** Di isiviae hoto mole loui la namigevei. La oleuoleu isiviae tota Diue menaka ehovamale lana menaka ke hoto mole huhulahalu.

**22** Hoto keu loui avoe, “Ebalahamu ese abuita houevenu. Keateve seleveu mole mamoru. Isege keate moleu abuho heiata loviamale keu eseve mole mamoru.”

**23** Heiata loviamale keate keu vatae keateau ese malemale ke nahate vaime ese ke mamoru. Isito Dilavau subuta louale ke vuvunemoike Ebalahamu mahina seleveu ese ke manu.

**24** Subuta vaveve kemo dovudovue hotou ua. Keate abui keau Dilavau hotoe tumu abui louale ke nahate. Dilavau vasohuta Sainai tana keve au ono vade vaveve hoto mai au ata ovenu. Iale hoto keu heiata loviamale keate Heiga ke nahate. Ke esea heiata loviamale esea.

**25** Sainai tana keu Alebia vatamo ua. Keve Moseseu Dilava menaka malei ata ovenu. Iale Heiga keu tana ke nahate. Isi keate keu ataaeau aike Dielusalemae ui menaka ke valamo umale kebia nahate. Ata keau heiata loviamale ke nahate.

**26** Isito Dilavau hotoe tumu mole loui Ebalahamu mahina seleveho louale hoto keu otogoe Dielusalema ke nahate. Otogoe Dielusalemae umale keau vatae Dielusalemae ui heiata loviamale kebia nahate holioholilu. Nahiau otogoe Dielusalema keve uveve ataea. Iale Sela keu nahie neina nahate.

**27** Isito Sela keu eseholisege Bukae Hotou kemo loui avoe,  
“Keate moleu ese houholiale kena vahaehoai.  
Keu subuta eseholige tumuu hamaholinu.  
Isito gabie tumuna hamage auna kekoai vahaehoai.

Kosealemo keate ke valadana bae balugai.  
 Keate ke koliau halei tiale keate moleti uge eseveua  
 ua.  
 Isito vasohuta keate ke valadana bae keate mole  
 ke ese evigevei balugai.”

<sup>28</sup> Deiadaveu kateanu. Isito di haokuvuia,  
 nahiua nova Dilava esea. Dilavau subuta louale  
 kemo Ebalahamu mo Aisikiu ua. Iale Dilavau  
 louale kemoike nahita Dilava ese holilu.

<sup>29</sup> Subuta vani kemo vatae ese keu Munanae  
 Tumumo uale ese ke vatetumu ominu. Iale ke  
 nahate novae vani komo vatae ataeau evievi ata  
 aiogevema.

<sup>30</sup> Ige kemo Bukae Hotou onole lounu. Keu  
 loui avoe, “Heiata loviamale keate isi move kebia  
 nunuyeve. Kosealemo heiata loviamale keate ke  
 eseu bae au mamae kunai malelivebene. Isito  
 Ebalahamu mahina seleve ke esena bae au ma-  
 mae kunai malei.”

<sup>31</sup> Iale di haokuvuia, nahiua heiata loviamale  
 keate ke ese holioholilu. Isito nahiua Ebalahamu  
 keate seleve ke esea.

## 5

### *Lainaho Diue menaka ehovalive.*

<sup>1</sup> Iesu Kelisou nahi maleveale nahi bae Diue  
 menaka ehovalivebene. Isito nahiabuna Iesu  
 isivi unaha vai. Katealemo lainaho Diue menaka  
 ke isivi valive. Isito negolahai Iesu isivi unaha  
 vaseve.

<sup>2</sup> Evive. Bolo daliko laheho louma. Mesoho  
 ata keau isiviai la vudie vate bohiho vase lainaho  
 niabemo taholahalive. Kosealemo abuna la vudie  
 vate bohis iisiviale la kemo Dilava nimo inutolo-  
 toloai. Isito la hilokage Iesu Kelisou bae kemo la  
 tedaevolvebene.

<sup>3</sup> Di tota laheho louge evive. Ata oleuoleu isiviai abu vudie vate bohiliho valiege abu Diue menaka bahata ehovai. Lainaho mole ehovei mole halevalive.

<sup>4</sup> La oleuoleu menaka ke ehovai huhulahai kosea, “Noeabuna menaka ehovage Dilavana no hoesegevege no vavevena inutolotoloai.” La kateai huhualemo Keliso halevalu. Iale Dilavaau bae laheho uvuai la hoesegevelivebene.

<sup>5</sup> Nahi kate halevaito nahie evievimo negolahai ui loui kosea, “Dilavana nahi hoesegevege nahie vavevena inutolotoloai.” Nahi kateai Dilava Munanae Tumu ke vuvunemo hemei ui isivialeike Dilavaau nahie hoesegevei.

<sup>6</sup> Keu nahi hoesegevege nahi Iesu Kelisoluvuta igaetolahai ua. Iale kemo nahie vudie vate bohiveve keu baluga holioholinu. Isito nahi Iesu ehovai nahie evievimo negolahai moleho isivilahai mole tedaevemale keu baluga.

<sup>7</sup> Hoto seleveu vasohuta lae lohogē la ke evie dua valu. Isito oleike lohoale laheho louge la ke halevalu.

<sup>8</sup> La hohaveale Dilava keu kateai laheho louholinu. Isito mesoho atae toelae abulike laheho kateale loulu.

<sup>9</sup> Ataeabuna beikini bauda esehame mai valavata ebuehage valava kena balugai. Ke nahate ataeau lae lohoale loboe hoto esehame loui la haiveale hoto kena bae laemo balugai.

<sup>10</sup> Isito di huhuige laeau Kosiveluvuta igaetolahale kemo la bae loboe hoto ke malivebene. Ige ata oleu la uvu isi la aiogeveale ata ke Dilavana ibinave omisi.

<sup>11</sup> Di haokuvuia, dau vudie vate bohilive hoto loui la haiveholima. Katealemoike Diue ataeau

daho itumulahai di aiohavoma. Di hoto kateale louvatege keau daho itumuholilu. Isito Iesuu idie domo hatiale hoto ke di louike vage abu daho itumulahai di aiohavolu.

<sup>12</sup> Iale di isivialeike ata oleuoleu la vate bohiliho la uvu isi la aiogevemale keau abu vudie vate bahata bohige uoholige la bae vaveveabe nahate valivebene.

<sup>13</sup> Di haokuvuia, Dilavau la hohavei la maleveale kemo la bae Diue menaka ehovai malivebene. Iale la huhuige lana valive la isivi unaha vai vavae isivi vagei. Ba, Dilavau isivialeike la moleho isivilahai mole tedaeveve.

<sup>14</sup> Dilava menaka mole keu loui avoe, “La la ebika hoesegeveale ke nahate la haokuvuho isivilahai hoesegeveve.” Lana menaka ke igae ehovalieve kemo Diue menaka bahata ke ehovave.

<sup>15</sup> Isito lainaho ovoe vaveve nahate vai vatehani mole ovelive. Lana kateale valiege molehi ugologoloai mole aiogevewe.

### *Munana Tumue vuvunemo uve.*

<sup>16</sup> Di louale keu koseanu. Munana Tumue vuvunemo uve. La ke vuvunemo ui isivive valiege la bae la vavae isivie vaveve ke valivebene.

<sup>17</sup> Nahie vavae isivi keu bae Munana Tumue isivi ke valivebene. Ige Munanae Tumu keu bae nahie vavae isivi ke valivebene. Keau molehi ugologoloalu. Katealemo nahi bae olete ke isivi valivebene.

<sup>18</sup> Isito nahiabuna Munana Tumue isivi valiege kemo nahi bae Diue menaka ke vuvunemo ulivebene.

<sup>19</sup> Nahi hilokage vavae isivie vaveve keu koseanu. Mole keatehi ladevei teibae vaveve vai huhuihuhuie toela kateale huhulahagei.

**20** Isi loboe dilava hoesegevei evelahai moleho itumulahai abu ebia tabagevei kemo mole tasalievei moleho loui mole havegei.

**21** Isi mole kunai elehai mole maina mai isi e toela isi tilogoai havue toela vai kemo iveve toela vagei. Di subuta laheho louale ke dana tota laheho lou moleai. Ata oleuoleu vavae isivi kateale vamale ata keau bae Dilava matamae doga keve talivebene.

**22** Isito Munanae Tumue vaveve keu koseanu. Ataeau Munanae Tumue vuvunemo uale ke-abuna moleho isivilahai vahaeholahai ue dua vagei. Isi moleho itumuholisito mole tedaevei vaveve dua moleho vai kemo abu evievimo negolahai ui tigei.

**23** Isi abu ebia nenigevei solekai itumuholisito saiavoi moleho lougei. Vaveve katealemo atae menakau ke bamuoholinu.

**24** Iesu Keliso ata holiale keau abu vavae isivi ke huhuholisito Iesu idie domo hatiale ke huhulahai vaveve toela halevalu.

**25** Munanae Tumu uveve doga nahioveale kemo nahi negolahai vuvunemmo ui tigei.

**26** Katealemo nahi nahie ebia malevei hatu halevai. Isi mole malevei itumutieve halevai mole maina mai i halevai.

## 6

### *Moleho vaveve dua vave.*

**1** Di haokuvuia, evievi ata moleu vaveve toela vage la oleuoleu Munanae Tumumo negola-haleau ata ke tedahoi haivuge vaveveveu inutolotoloai. Isito saiavoi avuho louve. Isi la ebika nenigeveve. Onoilata lata vaveveve toela nahate vama.

<sup>2</sup> Mole toela kemo mole tedaevei mole haiveve. Katealemo laeabuna Keliso menaka ke ehovave.

<sup>3</sup> Mesoho ata moleu huhuai avoe, “Dau baluga. Di ata mole tedaholivebene.” Keu kateaime au ebika lobohavoi ata baluga holioholinu.

<sup>4</sup> Isito nahi igaegae nahie vaveve elehai loui kosea, “Di vamale kou duave. Emena toelanu.” Ige nahie vaveveu dua vase nahiabuna kemo vahaeholahai hilokage nahie vaveveu inutolotoloanu. Nahi katedalahaito ata moleu vamale ke elehai loui kosea. “Kena duave. Emena toelanu.” Nahi kate halevai.

<sup>5</sup> Kosealemo ata igaegae abuna abu vamale ke ibina malei.

<sup>6</sup> Ata oleu hoto seleve loui la haivege ata ke tedahoi lovi omisi kunaita omive.

<sup>7</sup> Lainaho dolodololahalive. Kosealemo atabeu bae Dilava lobohavolivebene. La hilokage nahi bulumo onole hale ke nahie biaeabuna tota ke lovoi.

<sup>8</sup> Di louale keu koseanu. Nahiabuna vavae isivi vai tiliege gabie nahiabuna haluvisi. Isito nahiabuna Munana Tumue isivi vai tiliege gabie ukolikoli malei.

<sup>9</sup> Iale nahie vaveve dua vamale ke nahi kabebihavo halevai. Nahiabuna ke kabebihavoholiliege vaniveu lohogé nahiabuna nahi vamale ke ibina malei.

<sup>10</sup> Katealemo Dilavau humaha alavoge nahi ata bahata tedaevegei. Isito kebia vigomo evievi ata kebia tedaeve dua vasei.

### *Bolo hotoe gabi isi vahaehove hoto*

<sup>11</sup> Di louge ata moleu levaleva ko hisalianu. Isito levaleva kou gabihó vase di biageike di adala ko hisaliage la elehage hisali kou baluga.

<sup>12</sup> Di isivialeike ehue di louale hoto ke lou moleai. Osialemoike ata keau isiviale la vudie vate bohisi. Kosealemo keau Diue ata vabugevei isiviholialeike Diue ataeau vatehani oveliho. Kemoike abu isiviae la vudie vate bohige iviabeu balugai. Keau isiviholialeike Iesuu idie domo hatiale hoto ke unaha lougeliho. Abuna katalahai hoto ke unaha louge Diue ataeabuna vatehani ovei.

<sup>13</sup> Vudie vate bohimale ata keau Diue menaka bahata ehovaholima. Isito keau isiviae la vate bohisi kemo elike abu ebika tabagevei loui kosea, “Ata keau no hoto evisi malu.”

<sup>14</sup> Keau katalahama. Isito dau bae kateai di ebika ebagemalivebene. Dana nahie Kosive Iesu Kelisou idie domo hatiale hoto ke unaha loui ebagemai. Kosealemo Iesuu hatiale kemo vatae vaveveu bae di malivebene. Ige di bae vatae isivi valivebene.

<sup>15</sup> Mesoho nahi nahie vudie vate bohisi o bohioholige keu keti baluga holioholinu. Isito nahi subuta vamale ke halevai vaveve doga vage keu baluga.

<sup>16</sup> Iale ata oleuoleu abu uvevemo vaveve kateale valiege abuna ue dua vai Dilava ata seleve holisi. Ige Dilavana kebiaho uvuai kebia tedaevegei.

<sup>17</sup> Di hotou kemo kateai ua. Iale lainaho di aiohavolive. Kosealemo di Iesu lovi vasege ataeau dahavoge di vavau oheai samaguale kemo la hilokage dau Iesu esemu seleve.

<sup>18</sup> Di haokuvvia, di isivialeike nahie Kosive Iesu Kelisou vani bahata la huhuevei la hoesegevegei. Di hotou kemo kateai gabianu.

**Buka Tumute  
The New Testament in the Mountain Koiali Language  
of Papua New Guinea  
Nupela Testamen long tokples Maunten Koiali long  
Niugini**

copyright © 1981 Wycliffe Bible Translators, Inc.

Language: Mountain Koiali (Koiali, Mountain)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 18 Apr 2025 from source files dated 31 Aug 2023

db58c592-1903-54ff-a424-991321fd5949